

5 Mayo 2024

Ika-6 na Linggo ng Pasko ng Pagkabuhay

Taon B

“Manatili sa Aking Pag-ibig at Kayo’y Mamunga”

Patuloy ngayong tinatalakay ng Panginoong Hesus ang pakikipag-isa sa kanya bilang kundisyon upang magbunga ang kabanalan sa ating buhay. Binibigyang-diin niyang nasa pagtalima sa kanyang “Kautusang Magmahalan” ang praktikal na paraan ng pagpapatunay ng ating pakikiisa sa kanya upang tayo’y mamunga.

May kaugnayang nagbibigay-buhay sa pakikiisa kay Hesus at pagiging mabunga, pagiging mabunga at pagmamahalan, pagmamahalan at pagsunod sa mga Kautusan ng Diyos. Ang ipagdiriwang nating Eukaristiya ay isang tanda ng ating pakikiisa sa Panginoon at sa ating sari-sarili. Isa rin itong mabisang paraan ng pagpapatibay sa gayong pakikiisa kapag ipinahahayag natin ang Salita ng Diyos, lalo na sa sama-samang pagdarasal at pagtanggap ng Banal na Komunyon.



PASIMULA



Pambungad

(Ipahahayag lamang kung walang awiting nakahanda.)

Buong galak na ilahad upang marinig ng lahat ang ginawang pagliligtas ng Panginoong malakas. Aleluya ang ihayag!

Pagbati

P– Sa ngalan ng Ama at ng Anak at ng Espiritu Santo!

B– Amen!

P– Ang biyaya ng ating Panginoong Hesuskristo, ang pag-ibig ng Diyos Ama, at pakikiisa ng Espiritu Santo ay sumainyong lahat!

B– At sumaiyo rin!

Pagsisisi

P– Sa harap ng marami nating pagkukulang at paglabag sa

kautusang magmahal sa kapwa, hilingin natin ang pagpapatawad ng Panginoon at ang biyaya ng higit na katapatan. (*Manahimik saglit.*)

P– Panginoong Hesus, sa pamamagitan ng Apostol na si San Juan, itinuturo mo sa aming ang sinumang di magmahal ay walang pagkakilala sa Diyos. Panginoon, kaawaan mo kami!

B– Panginoon, kaawaan mo kami!

P– Panginoong Hesus, sinugo ka ng Ama upang kami’y magtamo ng buhay sa pamamagitan mo. Kristo, kaawaan mo kami!

B– Kristo, kaawaan mo kami!

P– Panginoong Hesus, tinuruan mo kaming magmahalan gaya ng pagmamahal mo sa amin. Panginoon, kaawaan mo kami!

B– Panginoon, kaawaan mo kami!

P– Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang

hanggan.

B– Amen!

Papuri

B– Papuri sa Diyos sa kaitaan at sa lupa’y kapayapaan sa mga taong kinalulugdan niya. Pinupuri ka namin, dinarantal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesuskristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesuskristo, ang Kataas-taasan,

kasama ng Espiritu Santo sa kadakilaan ng Diyos Ama. Amen!

Panalanging Pambungad

P –Ama naming makapangyarihan, gawin mong sa masasayang araw na ito ng aming pagdiriwang sa pagkabuhay ni Kristo, kami’y makaganap ng pagdiriwang na wagas upang ang aming ginugunita ay lagi naming matupad sa gawa, sa pamamagitan ni Heskristo kasama ng Espiritu Santo magpasawalang hanggan.

B –Amen!

PAGPAPAHAYAG NG SALITA NG DIYOS



Unang Pagbasa Gw 10:25-26.34-35.44-48

Ang pagpapabinyag ng senturyong Romanong si Cornelio at lahat ng kanyang kasama sa bahay ay isang natatanging palatandaan di lamang sa kanilang buhay, kundi sa kasaysayan man ng Simbahan. Sa kanyang pagbubukas ng pintuan para sa mga di-Judio, nagsimula ang Simbahan sa pagiging panlahat, anupa’t tahanan ng lahat ng bansa at kultura.

L– Pagbasa mula sa mga Gawa ng mga Apostol

Sinalubong ni Cornelio si Pedro at nagpatirapa sa harapan nito at sumamba. Ngunit sinabi ni Pedro, “Tumindig kayo. Ako’y tao ring tulad ninyo.

Ngayon ko lubusang natanto na walang itinatangi ang Diyos. Nalulugod siya sa sinumang may takot sa kanya at gumagawa ng matuwid, kahit saang bansa.”

Nagsasalita pa si Pedro nang bumaba ang Espiritu Santo sa mga nakikinig ng salita. Namangha ang mga mananampalatayang Judio na kasama ni Pedro, sapagkat ang mga ito ay pinagkalooban din ng Espiritu Santo. Narinig nila ang mga Hentil na nagsasalita sa iba’t ibang wika at nagpupuri sa Diyos.

Kaya’t sinabi ni Pedro, “Tulad natin, sila’y pinagkalooban din ng Espiritu Santo. Sino pa ang makahahadlang na binyagan sila sa tubig?” At iniutos niyang binyagan sila sa pangalan ni

Heskristo. Pagkatapos, hiniling nila kay Pedro na manatili roon ng ilang araw.

Ang Salita ng Diyos!

B –Salamat sa Diyos!


Salmong Tugunan Awit 98

B –Panginoong nagliligtas sa tanang bansa’y nahayag!

R. M. Velez



Pa-ngi-no-ong nag-li-lig-tas sa ta-



nang bansa’y naha-yag!

* Umawit ng bagong awit at sa Poon ay ilalay, pagkat yaong ginawa n’ya ay kahanga-hangang tunay! Sa sariling lakas niya at taglay na kabanalan, walang hirap na natamo yaong hangad na tagumpay. **B.**

* Ang tagumpay niyang ito’y siya na rin ang naghayag, sa harap ng mga bansa’y nahayag ang pagliligtas. Ang pangako sa Israel, lubos niyang tinutupad. **B.**

* Tapat siya sa kanila at ang pag-ibig ay wagas. Ang tagumpay ng ating Diyos kahit saan ay namalas! Magkaingay na may galak, yaong lahat sa daigdig; ang Poon ay buong galak na purihin sa pag-awit! **B.**

Ikalawang Pagbasa 1 Jn 4:7-10
Ipinaaalaala sa atin ngayon ni Apostol San Juan ang mahalagang ugnayan ng tunay na pagmamahal at pagkakilala sa Diyos. Binibigyang-diin din dito na si Hesus ang pinakadakilang tanda ng pagmamahal ng Ama sa atin.

L –Pagbasa mula sa Unang Sulat ni Apostol San Juan

Mga pinakamamahal: Mag-ibigan tayo sapagkat mula sa Diyos ang pag-ibig. Ang bawat umiibig ay anak ng Diyos, at kumikilala sa Diyos. Ang hindi umiibig ay hindi kumikilala sa Diyos, sapagkat ang Diyos ay pag-ibig.

Inihayag ng Diyos ang kanyang pag-ibig sa atin nang suguin niya ang kanyang bugtong na Anak upang magkaroon tayo ng buhay sa pamamagitan niya.

Ito ang pag-ibig: hindi sa inibig natin ang Diyos kundi tayo ang inibig niya at sinugo ang kanyang Anak upang maging handog sa ikapagpapatawad ng ating mga kasalanan.

Ang Salita ng Diyos!

B –Salamat sa Diyos!

Aleluya

Jn 14:23

B –Aleluya! Aleluya!

Ang sa aki’y nagmamahal, tutupad sa aking aral, Ama’t ako’y mananahan.
Aleluya! Aleluya!

Mabuting Balita Jn 15:9-17

Sa pagsunod sa mga utos ng Diyos, ang mga sumasampalataya ay nagiging bahagi ng kadena ng pagmamahal na nagbubuklod sa Ama at kay Hesus, kay Hesus sa kanyang mga disipulo, at ng mga disipulo sa isa’t isa.

P –Sumainyo ang Panginoon!

B –At sumaiyo rin!

P– Ang Mabuting Balita ng Panginoon ayon kay San Juan

B– Papuri sa iyo, Panginoon!

Noong panahong iyon, sinabi ni Hesus sa kanyang mga alagad: “Kung paanong iniibig ako ng Ama, gayon din naman, iniibig ko kayo; manatili kayo sa aking pag-ibig.

Kung tinutupad ninyo ang aking mga utos, mananatili kayo sa aking pag-ibig; tulad ko, tinutupad ko ang mga utos ng aking Ama at ako’y nananatili sa kanyang pag-ibig. Sinabi ko sa inyo ang mga bagay na ito upang makahati kayo sa kagalakan ko at malubos ang inyong kagalakan. Ito ang aking utos: mag-ibigan kayo gaya ng pag-ibig ko sa inyo.

Walang pag-ibig na hihigit pa sa pag-ibig ng isang taong nag-aalay ng kanyang buhay para sa kanyang mga kaibigan. Kayo’y mga kaibigan ko kung tinutupad ninyo ang mga utos ko. Hindi ko na kayo inaaring alipin, sapagkat hindi alam ng alipin ang ginagawa ng kanyang panginoon. Sa halip, inaari ko kayong mga kaibigan, sapagkat sinabi ko sa inyo ang lahat ng narinig ko sa aking Ama.

Hindi kayo ang pumili sa akin; ako ang pumili at humirang

sa inyo upang kayo'y humayo at mamunga, at manatili ang inyong bunga. Sa gayon, ang anumang hingin ninyo sa Ama sa aking pangalan ay ipagkakaloob sa inyo.

Ito ang iniuutos ko sa inyo: mag-ibigan kayo."

Ang Mabuting Balita ng Panginoon!

B – Pinupuri ka namin, Panginoong Hesukristo!

Homiliya

Sumasampalataya

B – Sumasampalataya ako sa Diyos Amang makapangyarihan sa lahat, na may gawa ng langit at lupa.

Sumasampalataya ako kay Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen!

Panalangin ng Bayan

P – May saysay lamang ang ating buhay kapag ito'y tigib ng pagmamahalang tulad ng pagmamahal ng Banal na Santatlo para sa atin. Sapagka't batid natin ang kahalagahan ng ganitong kaloob, manalangin tayo sa Panginoon:

B – Diyos ng pag-ibig, dinggin ang aming panalangin!

* Para sa lahat ng Kristiyano: Nawa'y sa kanilang pagmamahal kay Hesus, ay makakita sila ng inspirasyong magmahalan tulad ng kanyang iniuutos at magsikap para sa pagkakaisang idinalangin ni Hesus. Manalangin tayo! **B.**

* Para sa Santo Papa at lahat ng Obispo: Nawa'y manatili silang nagkakaisa sa buklod ng pagmamahalan kung paanong si Hesus ay kaisa ng Ama. Manalangin tayo! **B.**

* Para sa lahat ng tao sa mundo: Nawa'y maunawaan nilang tanging sa pangkapatirang pagmamahalang gaya ng kay Kristo, makapagtatamo sila ng tunay na pagsulong at pangmatagalang kapayapaan. Manalangin tayo! **B.**

* Para sa ating pamayanan at sa lahat ng bumubuo rito: Nawa'y magsikap tayong mapalago ang pangkapatirang pagmamahalan sa pamamagitan ng pagsugpo sa pagkamakasarihan at lahat ng anyo ng kawalang katapatan. Manalangin tayo! **B.**

* Para sa lahat ng mananampalatayang nagdiriwang ng *Flores de Mayo* sa karangalan ni Mariang Kabanalbanalan: Nawa'y tumulad sila sa kaniyang katapatan at kalinisan ng pagmamahal para sa lahat. Manalangin tayo! **B.**

* Para sa lahat ng mga pari, mga relihiyoso at relihiyosa: nawa'y lumago sila sa kanilang bokasyon sa pamamagitan ng proseso ng paghubog at pagsasanay upang silang lahat ay maging mga kapani-paniwalang saksi at tagapagpatunay sa Ebanghelyo. Manalangin tayo!

B.

P – Panginoong Hesus, nawa lahat ng aming gawa'y maging mapagmahal at alang-alang sa pagmamahal, at sa gayo'y papanaigin sa lupa ang pagmamahal na nagbubuklod sa iyo sa Ama at sa Espiritu Santo magpakailanman.

B – Amen!



P – Manalangin kayo . . .

B – Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P – Ama naming Lumikha, paakyat mo sa iyong piling sa

kalangitan ang aming mga panalanging kalakip ng haing mga alay, upang ang mga pinagindapat mong gawing dalisay ay maging marapat na makasalo sa piging ng iyong pagmamahal, sa pamamagitan ni Hesukristo kasama ng Espiritu Santo magpasawalang hanggan.

B – Amen!

Prepasyo ng Pagkabuhay V

P – Sumainyo ang Panginoon!

B – At sumaiyo rin!

P – Itaas sa Diyos ang inyong puso at diwa!

B – Itinaas na namin sa Panginoon!

P – Pasalamatan natin ang Panginoong ating Diyos!

B – Marapat na siya ay pasalamatan!

P – Ama naming makapangyarihan, tunay ngang marapat na ikaw ay aming pasalamatan ngayong ipinagdiriwang ang paghahain ng Mesiyas, ang maamong tupa na tumubos sa aming lahat.

Ang katawan ng Anak mong sa krus nabayubay ay handog ng pag-ibig na walang kapantay. Ito ang paghahaing ganap mong kinalugdan. Ito ang nilunggati ng dating pag-aalay. Ang buong sarili ng Anak mong si Hesus ay inihain sa iyo upang kami'y matubos. Siya ang dambana at paring naghahandog. Siya pa rin ang tupang handog na ibinukod.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami'y nagbubunyi sa iyong kadakilaan:

B – Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan!

Pinagpala ang naparirito sa ngalan ng Panginoon. Osana sa kaitaasan!

Pagbubunyi

B – Sa krus mo at pagkabuhay kami'y natubos mong tunay, Poong Hesus naming mahal, iligtas mo kaming tanan ngayon at magpakailanman.



B – Ama namin . . .

P – Hinihiling namin . . .

B– Sapagkat iyo ang kaharian at ang kapangyarihan at ang kapurihan magpakailanman! Amen!

Paanyaya sa Kapayapaan

Paghahati-hati sa Tinapay

B– Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P– Ito ang Panginoong Hesus, ang pinakadakilang tanda ng pag-ibig ng Diyos para sa atin. Siya ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.

B– Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

Kung ako ay mamahalin, mga utos ko'y tutupdin at sa inyo'y susuguin, Patnubay sa inyong piling. Aleluya ay awitin!

Panalangin Pagkapakinabang

P– Ama naming mapagmahal, kaming pinapagsalo mo sa pagkabuhay ng iyong Anak ay papakinabangin mong lagi sa kanyang lakas bilang bungang masagana ng dulot mong pagliligtas, sa pamamagitan niya kasama ng Espiritu Santo magpasawalang hanggan.

B – Amen!

PAGWAWAKAS



P– Sumainyo ang Panginoon.

B– At sumaiyo rin!

P– Magsiyuko kayo at ipanalangin ang pagpapala ng Diyos. *(Manahimik saglit.)*

– Sa pamamagitan ng muling pagkabuhay ng Kanyang Anak, tinubos kayo ng Diyos at hinirang kayong maging

Kanyang mga anak. Puspusin Niya nawa kayo ng kagalakan.

B – Amen!

P – Pinagkalooban kayo ng Manunubos ng ganap na kalayaan. Magtamo nawa kayo ng buhay na walang hanggan.

B – Amen!

P – Sa pananampalataya, bumanogon kayong kasama ni Hesus sa bautismo. Maging banal

nawa ang mga buhay ninyo upang kayo'y makasama niya magpakailanman.

B – Amen!

P – Pagpalain nawa kayo ng makapangyarihang Diyos: Ama, Anak, at Espiritu Santo.

B – Amen!


P – Tapos na ang Misa. Humayo kayo sa kapayapaan ni Kristo.

B – Salamat sa Diyos!

Are you preparing children for First Communion?

Then you need

“THE MASS EXPLAINED TO KIDS”



A coloring book on the Mass, with a collection of appropriate songs, basic Catholic prayers, and a Mass Guide for First Communion!

Contact **WORD And LIFE PUBLICATIONS**

for further information

on everything you need

for this memorable occasion

in the life of every Catholic child.



Tune in to Radio Veritas (846 kHz) every Saturday from 5:00 to 6:00 p.m. and listen to **BISPERAS SA VERITAS** the interactive radio program that helps you discover

– the messages of each Sunday Theme and Biblical readings, and
– how they can empower your life, your family, and your community.

ANO GANAP D'YAN?

Kalakbay at Katoto

Isang mahirap na gawain ang maghintay sa airport, lalu na kung ang eroplano ay wala pa o na-delay. Marami kang makikita at maririnig sa palibot mo. Pero may isang pagkakataong aliw na aliw ako habang naghihintay sa isang delayed flight sa isang airport sa America.

Kasama ng ilang malilikot na batang Pinoy sa biyahe ang kanilang lola galing Maynila. Hindi na marunong mag-Tagalog ang mga batang iyon na duon na isinilang sa America. Aligagang aligaga si Lola sa pagsubaybay sa mga paslit. Kaya, maya't maya ay ito ang kanyang wika: "Come." "Sit" "Stay."

Bigla kong naalala ang aking mga aso sa Laguna. Ganyan ang mga salitang gamit ko sa kanila!

Pero, hindi ito usapang aso. Gayunpaman, hindi natin maipagkakaila na sa ating panahon, ang pinakamahirap gawin ay ang "manatili," ang "maghintay," o ang "pumirmi" sa isang lugar, ika nga. Hirap tayo ngayon mag-stay sa isang lugar, manatili sa parehong trabaho ng maraming taon, o ang pumirmi sa tahanan, o manatili sa isang relasyon. Lagi tayong naghahanap ng iba. Lagi tayong balisa sa kung saan tayo pupunta para sa sunod na gimik. Parang hindi tayo masiyahan sa iisang gawain o "ganap" sa buong araw.

Kaya, ang tanong ng marami sa social media ay ito" "Ano ganap d'yan 'tol?" "May gimik ba?" "Kapuy na ku diri sa balay!"

Matindi ang paalaala sa atin ng Panginoon, sapagka't mahirap gawin sa ating panahon. Pero ang mahirap na gawaing ito ang lubha nating kinakailangan. Hindi kailanman yayabong ang sanga kung ito ay hihiwalay sa puno. Hindi maaaring magbunga ang sanga kung hindi nakakabit sa puno.

Pero malinaw ang Panginoon kung anong uri ng pananatili ang kanyang hinihiling sa atin. Hindi ito mababaw na "Yes, Lord," lamang. Hindi ito pabalat-bunga at pahapyaw na "Basta Ikaw, Lord!"

Ang hiling nya sa atin ay ang manatili sa kaniyang PAG-IBIG.

Hindi niya hiningi ang isang LIKE, o isang emoji na thumbs up. Hindi niya sinabing mag-ing FOLLOWERS ng kaniyang page. Hindi ito isang mababaw na pag SUBSCRIBE sa YT channel. Hindi ito isang GIMIK o GANAP na siya nating mababaw na hanap.

Ito ay isang pananatili sa GAWA. Ang umibig sa kaniya ay isang PANDIWA, hindi isang PANGNGALAN lamang, o panag-uri, o salitang pantulong. Hindi ito panandaliang GIMIK, bagkus isang pangmatagalang gawain o birtud.

Ang tamang tanong ay hindi dapat ANO BA'NG GANAP DIYAN? Ang tamang tanong ay dapat ito: ANO BA ANG PUEDE KONG GAWIN SA NGALAN NG PAG-IBIG SA DIYOS?



**WORD AND LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8475-8945 • Website: www.wordandlife.org

• E-mail: wordandlifepublications@gmail.com • FB: Word And Life Publications

• Editorial Team: Fr. B. Nolasco, Fr. J. Camaya, Fr. C. Dimaranan, V. David, R. Molomog, D. Daguio

• Illustrations: A. Sarmiento, B. Cleofe • Circulation: R. Saldua